

В СРЕДУ 5-Я СЕДМИЦЫ ВЕЧЕРА,

Стихословим вместо: Ко Господу внегда скорбети ми: кафисму 7.

На Господи воззвах, стихира самогласна, юже глаголем дважды.

Начинаем же стихи, от Впадут во мрежу свою:

Глас 8:

Моими помышлении в разбойники впад, * пленен бых окаянный умом, и люте уязвихся, * всю мою душу ураних, * и отнюд лежу наг добродетелей на житейшем пути. * Священник же видев мя ранами боляща безысцельна, * презрев не возре на мя: * левитянин же паки не терпя душетленные болезни, * и той видев мя мимо иде. * Ты же благоволивый, не от Самарии, * но от Марии воплотитися Христе Боже, * человеколюбием Твоим подаждь ми исцеление, * изливая на мя великую Твою милость.

Стих: Гласом моим ко Господу воззвах, гласом моим ко Господу помолихся.

Моими помышлении в разбойники впад, * пленен бых окаянный умом, и люте уязвихся, * всю мою душу ураних, * и отнюд лежу наг добродетелей на житейшем пути. * Священник же видев мя ранами боляща безысцельна, * презрев не возре на мя: * левитянин же паки не терпя душетленные болезни, * и той видев мя мимо иде. * Ты же благоволивый, не от Самарии, * но от Марии воплотитися Христе Боже, * человеколюбием Твоим подаждь ми исцеление, * изливая на мя великую Твою милость.

Стих: Пролито пред ним моление мое, печаль мою пред Ним возвещу.

Мученичен: Аще кая добродетель, * и аще кая похвала подобает святым? * Мечем бо преклониша выи, * Тебе ради преклоншаго небеса и сошедшаго: * излиша кровь свою Тебе ради истощившаго Себе, * и зрак рабий приемша: * смиришася до смерти, * нищету Твою подражающе. * Ихже молитвами по множеству щедрот Твоих, * Боже помилуй нас.

Стих: Внегда исчезати от мене духу моему и Ты познал еси стези моя.

Ины стихиры господина Иосифа, глас 8.

Подобен: Господи, аще и на судищи:

Господи, Ты священные ученики Твоя, * словесная небеса показал еси. * Сих священными ходатайствы, * земных мя зол избави, * воздержанием вознося разума всегда, * к страстем помышление мое, * яко Щедр и Человеколюбец.

Стих: На пути сем, по немуже хождах, скрыша сеть мне.

Подобен:

Имуще вси время пощения, * яко содейственника Божественным деянием, * плачим от всего сердца, и Спасу возопиим: * Твоими ученики Господи Многомилостиве, * спаси любовию Тя поющия, * яко Щедр и Человеколюбец.

Ина стихира господина Феодора, глас тойже.

Подобен: Славную и пречистую:

Стих: Смотрях одесную и возглядах, и не бе знаяй мене.

Апостоли прехвальнии, * мира молитвенницы, немощных врачеве, * здравия хранителие, во обоим нас соблюдайте, * пощения время проходящая: * во обоих божественно мирствующия, * ум несмущен страстей храняще, * да поем вси песнь Христу воскресшему, * яко Победителю.

Ины стихиры по алфавиту, 24, Великаго канона. Творение господина Андреа Критскаго. Глас 4.

Подобен: Хотех слезами:

Стих: Погибе бегство от мене, и несть взыскай душу мою.

{А} Все житие мое со блудницами и мытарями изжися: * убо возмогу ли поне в старости покаяться, * о нихже согреших, Содетелю всех * и врачу недугующих? * Господи, прежде даже до конца не погибну, спаси мя.

И творим на кийждо стих по 3 поклоны.

Стих: Возвах к Тебе Господи, рех: Ты еси упование мое, част моя еси на земли живых.

{В} Тяжестию небрежения содержимь есмь, * в тине валяюся, стрелою устрелен велиара, * и оскверняю мое еже по образу: * обратителю небрегущих, и Избавителю прегрешивших: * Господи прежде даже до конца не погибну, спаси мя.

Стих: Вонми молению моему, яко смирихся зело.

{Г} Бых преткновение человеком, * возделав яко земный земля, * браку сопрягохся Твоим повелением, * и преступих осквернив ложе мое: * от земли создавый не презри создания Твоего: Господи, * прежде даже до конца не погибну, спаси мя.

Стих: Избави мя от гонящих мя, яко укрепилхся паче мене.

{Д} Рядник бых души моей, * о плоти моей промышление твоя, * демонов поругание поставлен бых, * сластем работая и безместием: * благоутробием Твоим пощади, прогонителю демонов: * Господи, прежде даже до конца * не погибну, спаси мя.

Стих: Изведи из темницы душу мою, исповедатися имени Твоему.

{Е} Волею согреших паче всех, сего ради оставлен есмь, * имам противника души моей, плоти мудрование, * и помрачает мя. Просвещение сущих во тьме, * и наставниче заблуждаемых: * Господи, прежде даже до конца не погибну, спаси мя.

Стих: Мене ждут праведницы, дондеже воздаси мне.

{З} Живет, глагола пророк, * душа моя Господи, и восхвалит Тя, * зыщи овча заблуждшее мя, * и сопричти мя стаду Твоему: * даждь ми время покаяния, да стена воию Ти: * Господи, прежде даже до конца не погибну, спаси мя.

Стих: Из глубины возвах к Тебе Господи, Господи, услыши глас мой.

{Н} Согреших, согреших, преступив повеления Твоя Христе Боже, * милостив буди ми Благодетелю, * да прозрю внутренними очима, * и убегну тьмы, и со страхом возоию: * Господи, прежде даже до конца не погибну, спаси мя.

Стих: Да будут уши Твои внимлюще гласу моления моего.

{О} Зверие мя дивии обдержаша, * но от них мя исхити Владыко: * хочещи бо еже спастися, * и в познание истины приити всем человеком, * яко Создатель, и со всеми и мене спаси: * Господи, прежде даже до конца не погибну, спаси мя.

Стих: Аще беззакония назриши Господи Господи, кто постоит? Яко у Тебе очищение есть.

{В} Цельба буди ми Благодетелю, * Избавителю Спасе мой, и не отрини мене, * виждь мя лежаща беззаконьми, * и возстави мя яко Всесильный, * да и аз возведу деяния моя, и вопию Ти: * Господи, прежде даже до конца не погибну, спаси мя.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

{К} Сокрыв талант данный ми, яко несмысленный раб в землю закопах: * ибо якоже непотребный осудихся, * и не дерзаю прочее просити Тя, * яко незлобивый ущедри мя, * да и аз воззову: Господи, * прежде даже до конца не погибну, спаси мя.

Стих: От стражи утренния до нощи, от стражи утренния, да уповает Израиль на Господа.

{А} Езеро изсушивый страстей, * кровоточивыя прикосновением омет Твоих, * даждь ми оставление согрешений, * несумненною верою Тебе притекающему, * и прими мя якоже оную, и исцели мою болезнь: * Господи, прежде даже до конца не погибну, спаси мя.

Стих: Яко у Господа милость, и многое у Него избавление, и Той избавит Израиля от всех беззаконий его.

{М} Имаши седети на престоле, * сотворивый словом небо и землю: * имамы вси предстати, * поведающе Тебе грехи наша: * прежде дне онаго, в покаянии мя прими: * Господи, прежде даже до конца не погибну, спаси мя.

Стих: Хвалите Господа вси языцы, похвалите Его вси людие.

{Н} Призри оком благоутробным, * и буди ми милостив едине Спасе, * токи даруй исцелений * бедной моей и окаянной души, * измый от кала дел моих, да воспою: * Господи, прежде даже до конца не погибну, спаси мя.

Стих: Яко утвердися милость Его на нас, и истина Господня пребывает во век.

{Е} Мечи уготова велиар, * уловити потщався смиренную мою душу, * странна сотвори мя Щедре просвещения, разума лица Твоего: * державный в крепости, * сосудов сего исхити мя: * Господи, прежде даже до конца не погибну, спаси мя.

Стих: К Тебе возведох очи мои живущему на небеси: се яко очи раб в руку господий своих, яко очи рабыни в руку госпожи своея: тако очи наши ко Господу Богу нашему, дондеже ущедрит ны.

{О} В сем страстем поработихся, * оставив закон и Божественная писания, * всего мя исцели Благодетелю, * мене ради по мне быв Блаже, * обрати мя

Щедрый, страстей потребителю: * Господи, прежде даже до конца не погибну, спаси мя.

Стих: Помилуй нас Господи, помилуй нас: яко по многу исполнихомся уничижения, наипаче наполнися душа наша поношения гобзующих и уничижения гордых.

{П} Б лудница слезами омочает * пречистей же и честней нозе Твои, * вся увещаваючи еже притекати, * и приимати разрешение согрешений своих. * Тоя веру подаждь и мне Спасе, еже вопити Ти: * Господи, прежде даже до конца не погибну, спаси мя.

Припеваем к прочим: Слава Тебе Боже наш, слава Тебе.

{Р} С кверну очисти души моя, * мене ради обнищавый, и младенствовавший плотию, * каплю милости Твоя низпослав, * немощному и окаянному Христе: * омый от скверны, уврачуй недугующа: * Господи, прежде даже до конца не погибну, спаси мя.

Стих: Слава Тебе Боже наш, слава Тебе.

{Σ} У тверди Владыко душу мою, * к Тебе притекати, и Тебе работати присно: * покров бо мой еси и хранитель, и заступление и помощь, * сподоби Божий Слове, * вопити мне в дерзновении: * Господи, прежде даже до конца не погибну, спаси мя.

Стих: Слава Тебе Боже наш, слава Тебе.

{Т} С тена нерушимая буди нам Иисусе Спасе, * и милостивый Боже, * нравы бо и дела прельщени спадохом: * но возстави яко Благодетель создание, * и примириися яко Щедр. * Господи, прежде даже до конца не погибну, спаси мя.

Стих: Слава Тебе Боже наш, слава Тебе.

{У} С ын блудный бых, * расточивый богатство, * голодом ныне истаяваю. Под кров Твой прибегаю, * якоже онаго приими мя Отче благий, * и причастника трапезы сподоби, еже вопити Тебе: * Господи, прежде даже до конца не погибну, спаси мя.

Стих: Слава Тебе Боже наш, слава Тебе.

{Ф} З авистию низложи рая, * первозданнаго злоначальник: * рекий, еже помяни, * на древе разбойник, прият рай. * Аз же верою и страхом, еже помяни мя, вопию Ти: * Господи, прежде даже до конца не погибну, спаси мя.

Стих: Слава Тебе Боже наш, слава Тебе.

{Х} Р уку ми простри яко Петрови, * и возведи из глубины Боже, * благодать и милость ми подаждь, * молитвами Всенепорочныя Матере, * Тебе рождшия безсеменно, * и святых Твоих всех: * Господи, прежде даже до конца не погибну, спаси мя.

Стих: Слава Тебе Боже наш, слава Тебе.

{Ψ} П оюща приими мя, * на всяк день Агнче земляй грех мой, * душу и тело * всецельно в руке Твои предлагаю, * и в нощи и во дни должно вопию Ти: * Господи, прежде даже до конца не погибну, спаси мя.

Слава Отцу, и Сыну, и Святому Духу.

{Ω} О неизреченного Твоего благоутробия, * преблагий, незлобивый Господи! * О безгрешный и щедрый! * Не отрини мене от лица Твоего, * яко да и аз благодарственно, радуясь и поя воишо Ти: * Господи, прежде даже до конца не погибну, спаси мя.

И ныне, Богородичен:

О неизреченного снисхождения! * О странного рождества пречудного! * О како Дева Младенца Тя носит * во объятиих Своих Творца и Бога! * Из Нея воплотится изволивый, благодетелю Господи, * прежде даже до конца не погибну, спаси мя.

Вход. Свете тихий:

Прокимен, псалом 93. Глас 4: Бог отмщений Господь, Бог отмщений, не обинулся есть.

Стих: Вознесися судяй земли, воздаждь воздаяние гордым.

Бытия чтение. [Глава 17, ст. 1 – 9.]

Бысть Авраму лет девятыдесят девять: и явися Господь Авраму, и рече ему: Аз есмь Бог твой, благоугождай предо Мною, и буди непорочен. И положу завет Мой между Мною, и между тобою, и умножу тя зело. И паде Аврам на лица своем: и рече ему Бог глаголя: И Аз се завет Мой с тобою, и будеши отец множества языков. И не наречется ктому имя твое Аврам, но будет имя твое Авраам: яко отца многих языков положих тя. И возращу тя зело зело, и положу тя в народы, и царие из тебе изыдут: И поставлю завет Мой между Мною и между тобою, и между семенем твоим по тебе в роды их в завет вечен, да буду тебе Бог, и семени твоему по тебе: И дам тебе и семени твоему по тебе землю, в нейже обитаеши, всю землю Ханааню во одержание вечное, и буду им Бог. И рече Бог ко Аврааму: ты же завет Мой соблюдеши, ты и семя твое по тебе в роды их.

Прокимен, псалом 94. Глас 4: Воспойте Господеви песнь нову.

Стих: Воспойте Господеви, благословите имя Его.

Притчей чтение. [Глава 15, ст. 20 – 33. Глава 16, ст. 1 – 9.]

Сын премудр веселит отца: сын же безумен раздражает мать свою. Несмысленнаго стези скудны ума: муж же разумен исправляя ходит. Отлагают помышления не чтущии сонмищ: в сердцах же советных пребывает совет: Не послушает злый его, ниже речет полезно что и добро общему. Путие живота помышления разумнаго, да уклонився от ада спасется. Домы досадителей разоряет Господь: утверди же предел вдовицы. Мерзость Господеви помысл неправедный: чистых же глаголы честны. Губит себе мздоимец: ненавидяй же даров приятия спасется. милостынями и верами очищаются греси: страхом же Господним уклоняется всяк от зла. Сердца праведных поучаются вере: уста же нечестивых отвещают злая. приятни пред Господем путие мужей праведных, имиже и врази друзи бывают. Далече отстоит Бог от нечестивых: молитвы же праведных послушает. лучше малое приятие с правдою, нежели многая жита с неправдою. сердце мужа да мыслит праведная, да от Бога исправятся стопы его. Видящее око добрая, веселит сердце: слава же благая утучняет кости. Слушаяй обличений

живота, посреде премудрых водворится. Иже отменяет наказание, ненавидит себе: соблюдаяй же обличения, любит свою душу. Страх Господень наказание, и премудрость: и начало славы отвещает ей: [предыдет же смиренным слава.] Человеку предложение сердца: и от Господа ответ языка. Вся дела смиренного явлена пред Богом: и укрепляй духи Господь. Приблизь ко Господу дела твоя, и утвердятся помышления твоя. Вся содела Господь Себе ради: нечестивии же в день зол погибнут. Нечист пред Богом всяк высокосердый, в руку же руке влагаяй неправедно, не обезвинится. Начало пути блага, еже творити праведная, приятна же пред Богом паче, нежели жрети жертвы. Ищай Господа, обрящет разум с правдою: Праве же ищущии Его, обрящут мир. Вся дела Господня с правдою: хранится же нечестивый на день зол.

Таже, Да исправится молитва моя: И прочее последование
Преждеосвященных.

Аще ли не будет Преждеосвященных: На Господи воззвах, поем Триади подобны три: и стихирь 24, Великаго канона. На стиховне самогласен дне, дважды, и мученичен. Слава, и ныне, Богородичен: и прочее. Прокимен. И чтения.

На трапезе разрешаем на елей, и вина причащаемся труда ради бденнаго, хотящаго быти. Внимающии же спастися, воздержанию прилежат: множайшии же посту нелицемерну. Повечерие же глаголем Малое в келлиях без поклонов. По трисвятом кондак Андреева канона. Такожде и Полунощницу.

В ЧЕТВЕРТОК 5-Я СЕДМИЦЫ СВЯТЫХ ПОСТОВ,

клепает в 4-й час ноши. И собравшимся нам в церковь бывает начало от иереа, по обычаю. И глаголем: Царю Небесный: Трисвятое, и Отче наш: Господи помилуй, 12. Слава, и ныне: Приидите поклонимся: И прочия два псалма, 19 и 20: и обычныя тропари, и ектеня. И посем глаголем шестопсалмие, и по псалмех поем Аллилуиа, и Троичны гласа, якоже обычай. И стихословим кафисму едину 8-ю. Таже глаголем седальны Осмогласника. Чем житие преподобныя Марии, на две статьи. Таже псалом 50. Песней не стихословим. И абие начинаем Великий канон косоно, и с сокрушенным сердцем и гласом, творяще на кийждо тропарь метания три.

Канон Великий, творение святого Андреа Критскаго Иерусалимскаго. Глас 6.

Песнь 1.

Ирмос: Помощник и Покровитель * бысть мне во спасение: * Сей мой Бог * и прославлю Его: * Бог отца моего, * и вознесу Его: * славно бо прославился:

Припев: Помилуй мя, Боже, помилуй мя.

Откуда начну плакати окаяннаго моего жития деяний? кое ли положу начало, Христе, нынешнему рыданию? Но яко благоутробен, даждь ми прегрешений оставление.

Гряди окаянная душе, с плотию твою, Зиждителю всех исповеждься, и останися прочее прежняго безсловесия, и принеси Богу в покаянии слезы.

Первозданнаго Адама преступлению поревновав, познах себе обнажена от Бога и присносущнаго Царствия и сладости, грех ради моих.

Увы мне окаянная душе, что уподобилася еси первой Еве? Видела бо еси зле, и уязвилася еси горце, и коснулася еси древа и вкусила еси дерзостно безсловесныя снеди.

Вместо Евы чувственныя мысленная ми бысть Ева, во плоти страстный помысл, показуяй сладкая и вкушаяй присно горькаго напоения.

Достойно из Едема изгнан бысть, яко не сохранив едину Твою, Спасе, заповедь Адам: аз же что постражду, отменяя всегда животная Твоя словеса?

Каиново прешед убийство, произволением бых убийца совести душевней, оживив плоть, и воевав на ню лукавыми моими деяньми.

Авелеве Иисусе, не уподобихся правде, дара Тебе приятна не принесох когда, ни деяния божественна, ни жертвы чистыя, ни жития непорочнаго.

Яко Каин и мы, душе окаянная, всех Содетелю деяния скверная, и жертву порочную, и непотребное житие принесохом вкупе: темже и осудихомся.

Брение Здатель живосоздав, вложил еси мне плоть и кости, и дыхание и жизнь: но о Творче мой, Избавителю мой, и Судие кающася приими мя.

Извещаю Ти Спасе, грехи, яже содеях, и души и тела моего язвы, яже внутрь убийственнии помыслы разбойнически на мя возложиша.

Аще и согреших, Спасе, но вем, яко Человеколюбец еси, наказуеши милостивно, и милосердствуеши тепле: слезяща зриши, и притекаеши яко Отец, призывая блуднаго.

Повержена мя Спасе, пред враты Твоими, поне на старость не отрини мене во ад тща, но прежде конца, яко Человеколюбец, даждь ми прегрешений оставление.

В разбойники впадый аз есмь, помышленьми моими, весь от них уязвихся ныне, и исполнихся ран: но Сам ми представ, Христе Спасе исцели.

Священник мя предвидев мимо иде, и левит видя в лютых нага презре: но из Марии возсиявый Иисусе, Ты представ ущедри мя.

Агнче Божий, вземлай грехи всех, возми бремя от мене тяжкое греховное, и яко благоутробен, даждь ми слезы умиления.

Покаяния время, прихожду Ти Создателю моему, возми бремя от мене тяжкое греховное, и яко благоутробен, даждь ми слезы умиления.

Не возгнушайся мене Спасе, не отрини от Твоего лица, возми бремя от мене тяжкое греховное и, яко благоутробен, даждь мне грехопадений оставление.

Вольная, Спасе, и невольная прегрешения моя, явленная и сокровенная и ведомая и неведомая, вся прости, яко Бог, очисти и спаси мя.

От юности Христе, заповеди Твоя преступих, всестрасно небрегий, унынием преидох житие. Темже зову Ти Спасе: поне на конец спаси мя.

Богатство мое Спасе, изнунив в блуде, пуст есмь плодов благочестивых, алчен же зову: Отче щедрот, предварив Ты мя ущедри.

Тебе припадаю Иисусе, согреших Ти, очисти мя, возми бремя от мене тяжкое греховное, и яко благоутробен, даждь ми слезы умиления.

Не вниди со мною в суд нося моя деяния, словеса изыскуя, и исправляя стремления: но в щедротах Твоих презирая моя лютая, спаси мя Всесильне.

Иный канон преподобныя матере нашея Марии Египетския, в тойже глас, и ирмос. Егоже краестрочие: Ты преподобная Марие помогай.

Запев: Преподобная мати Марие, моли Бога о нас.

Ты ми даждь светозарную благодать от Божественнаго свыше промышления, избежати страстей омрачения, и пети усердно, твоего Марие жития, красная исправления.

Запев: Преподобная мати Марие, моли Бога о нас.

Приклоньшия Христовым Божественным законом, к Сему приступила еси, сладостей неудержимая стремления оставивши, и всякую добродетель всеблагоговейно, яко едину исправила еси.

Андрею: Преподобне отче Андрее моли Бога о нас.

Молитвами твоими нас, Андрее, избави страстей безчестных и Царствия ныне Христова общники верою и любовию воспевающия тя, славне, покажи, молимся.

Слава, Троицен: Пресушная Троице, во Единице покланяемая, возми бремя от мене тяжкое греховное, и яко благоутробна, даждь ми слезы умиления.

Богородичен: Богородице, надежде и предстательство Тебе поющих, возми бремя от мене тяжкое греховное, и яко Владычица Чистая, кающася прими мя.

Песнь 2.

Ирмос: **В**онми небо, * и возглаголю, * и воспую Христа, * от Девы плотию пришедшаго.

Вонми небо, и возглаголю, земле, внушай глас, кающийся к Богу и воспевающий Его.

Вонми ми, Боже, Спасе мой милостивным Твоим оком, и прими мое теплое исповедание.

Согреших паче всех человек, един согрехих Тебе: но ущедря яко Бог, Спасе, творение Твое.

Буря мя злых обдержит, благоутробне Господи: но яко Петру, и мне руку прости.

Слезы блудницы, Щедре, и аз предлагаю: очисти мя, Спасе, благоутробием Твоим.

Омрачих душевную красоту страстей сластьми, и всячески весь ум персть сотворих.

Раздрах ныне одежду мою первую, иже ми изтка Зиждитель изначала, и отгуду лежу наг.

Облекохся в раздранную ризу, юже изтка ми змий советом, и стыждуся.

Воззрех на садовную красоту и прельстихся умом: и отгуду лежу наг, и срамляюся.

Делаша на хребте моем вси начальницы страстей, продолжающе на мя беззаконие их.

Погубих первожданную доброту и благолешие мое, и ныне лежу наг, и стыждуся.

Спиваше кожные ризы грех мне, обнаживый мя первыя боготканная одежды.

Обложен есмь одеянием студа, якоже листвию смоковным, во обличение моих самовластных страстей.

Одеяхся в срамную ризу, и окровавленную студно, течением страстного и любосластного живота.

Оскверних плоти моя ризу и окалях еже по образу, Спасе, и по подобию.

Впадох в страстную пагубу и в вещественную тлю, и оттоле до ныне враг мне досаждает.

Любовецное и любоименное житие, невоздержанием Спасе предпочет ныне, тяжким бременем обложен есмь.

Украсих плотский образ скверных помышлений различным обложением, и осуждаюся.

Внешним прилежно благоукрашением едином попекохся, внутреннюю презрев богообразную скинию.

Вообразив моих страстей безобразие, любосластными стремленьми погубих ума красоту.

Погребох перваго образа доброту Спасе страстьми, юже яко иногда драхму, взыскав обрящи.

Согреших, якоже блудница вопию Ти: един согреших Тебе, яко миро приими Спасе и моя слезы.

Поползохся яко Давид блудно, и осквернихся: но омый и мене Спасе, слезами.

Очисти, якоже мытарь вопию Ти, Спасе очисти мя: никтоже бо сущих из Адама, якоже аз согреших Тебе.

Ни слез, ниже покаяния имам, ниже умиления: Сам ми сия Спасе, яко Бог даруй.

Аверь Твою не затвори мне тогда, Господи, Господи: но отверзи ми сию кающемуся Тебе.

Человеколюбче хотяй всем спастися, Ты воззови мя, и приими яко Благ кающагося.

Внуши воздыхания души моя, и очию моею приими капли Спасе, и спаси мя.

Богородичен: Пречистая Богородице Дево, едина Всепетая, моли прилежно во еже спастися нам.

Ирмос: Видите видите, * яко Аз есмь Бог: * манну одождивый, * и воду из камене источивый древле * в пустыни людем Моим десницею единою, * и крепостию Моею.

Видите видите, яко Аз есмь Бог: внушай душе моя Господа вопиюща, и удалися прежняго греха, и бойся яко неумытнаго, и яко Судии и Бога.

Кому уподобилася еси многогрешная душе, токмо первому Каину, и Ламеху оному, каменовавшая тело злодействы, и убившая ум безсловесными стремленьми.

Вся прежде закона претекши, о душе! Сифу не уподобилася еси, ни Еноса подражала еси, ни Еноха преложением, ни Ноя: но явилася еси убога праведных жизни.

Едина отверзла еси хляби гнева, Бога твоего, душе моя, и потопила еси всю, якоже землю плоть, и деяния и житие, и пребыла еси вне спасительнаго ковчега.

Мужа убих, глаголет, в язву мне, и юношу в струи, Ламех рыдая вопияше, ты же не трепещи о душе моя, окалявши плоть, и ум осквернивши.

О како поревновах Ламеху, первому убийце, душу яко мужа, ум яко юношу, яко брата же моего тело убив, яко Каин убийца, любосластными стремленьми.

Столп умудрила еси создати о душе, и утверждение водрузити твоими похотьми, аще не бы Зиждитель удержал советы твоя, и низверг на землю ухищрения твоя.

Уязвихся, уранихся, се стрелы вражия уязвившия мою душу и тело: се струи, гноения, омрачения, вопиют раны самовольных моих страстей.

Одожди Господь от Господа огонь иногда, на беззаконие гневающее сожет Содомляны: ты же огонь вжегла еси геенский, в немже имаши, о душе, сожещися.

Разумейте и видите, яко Аз есмь Бог, испытай сердца, и умучай мысли, обличаяй деяния, и попаляяй грехи, и судяй сиру, и смирену, и нищу.

Запев: Преподобная мати Марие, моли Бога о нас.

Преподобней: Простерла еси руце твои к щедрому Богу, Марие, в бездне зол погружаемая: и якоже Петру человеколюбно, руку Божественную простре, твое обращение всячески иский.

Запев: Преподобная мати Марие, моли Бога о нас.

Марии: Всем усердием и любовию притекла еси Христу, первый греха путь отвращши, и в пустынях непроходимых питающися, и Того чисте совершающа Божественныя заповеди.

Запев: Преподобне отче Андрее, моли Бога о нас.

Видим, видим человеколюбие, о душе, Бога и Владыки: сего ради прежде конца, Тому со слезами припадем вопиюще: Андрея молитвами, Спасе, помилуй нас.

Слава, Троицен: Безначальная, несозданная Троице, нераздельная Единице, кающася мя приими, согрешивша спаси, Твое есмь создание, не презри: но пощади и избави огненнаго мя осуждения.

Богородичен: Пречистая Владычице, Богородительнице, надеждо к Тебе притекающих, и пристанище сущих в бури, Милостиваго и Создателя и Сына Твоего умилостиви и мне молитвами Твоими.

Песнь 3.

Ирмос: На недвижимем, Христе, * камени заповедий Твоих * утверди мое помышление.

Огнь от Господа иногда Господь одождив, землю Содомскую прежде попали.

На горе спасайся, душе, якоже Лот оный, и в Сигор угонзай.

Бегай запаления, о душе, бегай Содомскаго горения, бегай тления Божественнаго пламене.

Исповедаюся Тебе, Спасе: согреших, согреших Ти: но ослаби, остави ми, яко благоутробен.

Согреших Тебе един аз, согреших паче всех, Христе Спасе, да не презриши мене.

Ты еси Пастырь добрый, взыщи мене агнца, и заблудшаго да не презриши мене.

Ты еси сладкий, Иисусе, Ты еси Создатель мой: в Тебе, Спасе, оправдаюся.

Троицен: **О** Троице Единице Боже! Спаси нас от прелести, и искушений, и обстояний.

Богородичен: Радуйся, Богоприятная утробо, радуйся, престоле Господень, радуйся, Мати Жизни наша.

Ирмос: Утверди Господи * на камени заповедей Твоих, * подвигшееся сердце мое, * яко един Свят еси и Господь.

Источник живота стяжах Тебе, смерти низложителя, и вопию Ти от сердца моего прежде конца: согреших, очисти и спаси мя.

При Нои, Спасе, блудствовавшия подражах, оных наследствовав осуждение, в потопе погружения.

Согреших, Господи, согреших Тебе, очисти мя: несть бо иже кто согреши в человецех, егоже не превзыдох прегрешеньми.

Хама онаго душе, отцеубийца подражавши, срама не покрыла еси искренняго, вспять зря возвратившись.

Благословения Симова не наследовала еси душе окаянная: ни пространное одержание, якоже Иафет имела еси на земли оставления.

От земли Харран, изыди от греха душе моя, гряди в землю точашую присноживотное нетление, еже Авраам наследова.

Авраама слышала еси душе моя, древле оставльша землю отечества, и бывша пришельца, сего произволеню подражай.

У дуба Мамврийскаго учредив патриарх ангелы, наследова по старости обетования ловитву.

Исаака окаянная душе моя, разумевши новую жертву, тайно всесожженную Господеви, подражай его произволеню.

Исмаила слышала еси, трезвися душе моя, изгнана яко рабынино отрождение, виждь, да не како подобно что постраждеши ласкосердствующи.

Агаре древле душе, египтяныне уподобилася еси, поработившись произволением, и рождши новаго Исмаила, презорство.

Иаковлю лествицу разумела еси душе моя, являемую от земли к небесем, почто не имела еси восхода тверда, благочестия?

Священника Божия, и царя уединена, Христово подобие, в мире жития, в человецех подражай.

Не буди столп сланный душе, возвратившись вспять: образ да устрашит тя Содомский, горе в Сигор спасайся.

Западения якоже Лот, бегай душе моя греха: бегай Содомы и Гоморры, бегай пламене всякаго безсловеснаго желания.

Помилуй Господи, помилуй мя, вопию Ти, егда приидеши со ангелы Твоими, воздати всем по достоянию деяний.

Моления Владыко, Тебе поющих не отвержи: но ущедри Человеколюбче, и подаждь верою просящим оставление.

Запев: Преподобная мати Марие, моли Бога о нас.

Марии: Содержимь есмь бурей, и треволнением согрешений, но сама мя мати ныне спаси, и к пристанищу Божественнаго покаяния возведи.

Запев: Преподобная мати Марие, моли Бога о нас.

Марии: Рабское моление и ныне преподобная принесши ко благоутробней молитвами твоими Богородице, отверзи ми Божественныя входы.

Андрею: Преподобне отче Андрее моли Бога о нас.

Андрею: Твоими молитвами даруй и мне оставление долгов, о Андрее, Критский председателю! покаяния бо ты таинник презрядный.

Слава, Троичен: Троице простая, несозданная, безначальное Естество, в Троице певаемая Ипостасей, спаси ны верою покланяющияся державе Твоей.

Богородичен: От Отца безлетна Сына, в лето Богородительнице, неискусомужно родила еси, странное чудо, пребывши Дева, доящи.

Седален, глас 8:

Светила богозрачная, Спасовы апостоли, просветите нас во тьме жития, яко да во дни ныне благообразно ходим, светом воздержания нощных страстей отбегающе, и светлыя страсти Христовы узрим, радующеся.

Слава, другий седален, глас тойже:

Апостольская двенадцатице богоизбранная, мольбу Христу ныне принеси, постное поприще всем прейти, совершающим во умилении молитвы, творящим усердно добродетели, яко да сиче предварим видети Христа Бога славное Воскресение, славу и хвалу приносяще.

И ныне, Богородичен:

Непостижимаго Бога, Сына и Слово, несказанно паче ума из Тебе рождшееся, моли Богородице со апостола, мир вселенней чистый подати, и согрешений дати нам прежде конца прощение, и Царствия Небеснаго крайния ради благодти, сподобити рабы Твоя.

Таже трипеснец, без поклонов, глас 8.

Песнь 4.

Ирмос: Услышах Господи * смотрения Твоего таинство, * разумех дела Твоя, * и прославих Твое Божество.

Воздержанием поживше просвещеннии Христовы апостоли, воздержания время нам ходатайствы Божественными утишают.

Двенадцатострунный орган, песнь воспе спасительную, учеников лик божественный, лукавая возмущая гласования.

Одождением духовным всю подсолнечную напоисте, сушу отгнавше многобожия всеблаженнии.

Богородичен: Смирившася спаси мя, высокоумудренно пожившаго, рождающая Вознесшаго смиренное естество, Дево Всечистая.

Иный. Глас тойже.

Ирмос: Услышах Господи ...,

Апостольское всечестное ликостояние, Зиждителя всех молящее, проси помиловати ны восхваляющия тя.

Яко делателе суще Христовы апостоли, во всем мире Божественным Словом возделавшии, приносите плоды Ему всегда.

Виноград бысте Христов воистинну возлюбленный, вино бо духовное источисте миру апостоли.

Троицен: Преначальная, сообразная, всеильнейшая Троице Святая, Отче, Слово и Душе Святыи, Боже, Свете и Животе, сохрани стадо Твое.

Богородичен: Радуйся, престоле огнезрачный, радуйся, светильниче свещеносный, радуйся, горо освящения, ковчеже жизни, святых святая сене.

Ирмос: Услыша пророк пришествие Твое, * Господи, и убоясь, * яко хочещи от Девы * родитися и человеком явитися, * и глаголаше: * услышах слух Твой * и убояхся: * слава силе Твоей Господи.

Дел Твоих да не презриши, создания Твоего да не оставиши, Правосуде, аще и един согреших, яко человек, паче всякаго человека, Человеколюбче, но имаши, яко Господь всех, власть оставляти грехи.

Приближается, душе, конец, приближается, и нерадиши, ни готовишися: время сокращается, востани, близ при дверех Судия есть: яко соние, яко цвет, время жития течет: что все мятемся?

Восприяни, о душе моя, деяния твоя, яже соделала еси, помышляй, и сия пред лице твое принеси, и капли испусти слез твоих: рцы со дерзновением деяния и помышления Христу, и оправдайся.

Не бысть в житии греха, ни деяния, ни злобы, еяже аз, Спасе, не согреших умом и словом, и произволением и предложением, и мыслию и деянием согрешив, яко ин никтоже когда.

Отсюда и осужден бых, отсюда препрен бых аз окаянный от своя совести, еяже ничтоже в мире нужнейше: Судие Избавителю мой, и ведче, пощади и избави, и спаси мя раба Твоего.

Лествица, юже виде древле великий в патриарсех, указание есть душе моя, деятельнаго восхождения, разумнаго возшества: аще хочещи убо, деянием, и разумом, и зрением пожити, обновися.

Зной дневный претерпе лишения ради патриарх, и мраз ноцный понесе, на всяк день снабдения твоя, пасый, труждайся, работаяй, да две жене сочтает.

Жены ми две разумей, деяние же и разум в зрении, Лию убо деяние, яко многочадную: Рахиль же разум, яко многотрудную: ибо кроме трудов, ни деяние, ни зрение душе, исправится.

Бди о душе моя! изрядствуй якоже древле великий в патриарсех, да стяжещи деяние с разумом, да будещи ум зряй Бога и достигнеши незаходящий мрак в видении, и будещи великий купец.

Дванадесать патриархов, великий в патриарсех детотворив, тайно утверди тебе лествицу деятельнаго душе моя восхождения: дети, яко основания: степени, яко восхождения, премудренно подложив.

Исава возненавиденнаго подражала еси душе, отдала еси прелестнику твоему первыя доброты первенство, и отеческия молитвы отпала еси, и дважды поползнула еси окаянная, деянием и разумом: темже ныне покайся.

Едом Исав наречеса, крайняго ради женонеистовнаго смешения: невоздержанием бо присно разжигаемь, и сладьми оскверняемь, Едом именовася, еже глаголется разжжение души любогреховныя.

Иова на гноищи слышавши, о душе моя, оправдавшагося, того мужеству не поревновала еси, твердаго не имела еси предложения, во всех яже веси, и имиже искусилася еси, но явилася еси нетерпелива.

Иже первее на престоле, наг ныне на гноищи гноен: многий в чадах и славный, безчаден и бездомок напрасно: палату убо гноище, и бисерие струпы вменяше.

Тело осквернися, дух окаляся, весь острупихся: но яко врач Христе, обоя покаянием моим уврачуй, омой, очисти, покажи Спасе мой, паче снега чистейша.

Тело Твое и кровь распинаемый о всех положил еси Слове: тело убо, да мя обновиши: кровь, да омыеши мя: дух же предал еси, да мя приведиши Христе, Твоему Родителю.

Соделал еси спасение посреде земли Щедре, да спасемся. Волею на Древе распялся еси. Едем затворенный отверзесе, горняя и дольняя тварь, языцы вси спасени покланяются Тебе.

Да будет ми купель, кровь из ребр Твоих, вкупе и питие, источившее воду оставления, да обоюду очищаюся, помазуяся и пия: яко помазание и питие Слове, животоčná Твоя словеса.

Наг есмь чертога, наг есмь и брака, купно и вечери: светильник угасе, яко безъелейный, чертог заключися мне спящу, вечеря снесесе: аз же по руку и ногу связан, вон низвержен есмь.

Чашу Церковь стяжа, ребра Твоя живоносная, из нихже сугубья нам источи токи, оставления и разума, во образ древняго и новаго двоих вкупе заветов, Спасе наш.

Время живота моего мало, и исполнено болезней и лукавства: но в покаянии мя прими, и в разум призови, да не буду стяжание, ни брашно чуждему, Спасе, Сам мя ущедри.

Высокоглаголив ныне есмь, жесток же и сердцем, вотще и всеу, да не с фарисеем осудиши мя, паче же мытарево смирение подаждь ми едине Щедре, Правосуде, и сему мя сочисли.

Согреших, досадив сосуду плоти моя, вем Щедре: но в покаянии мя прими, и в разум призови, да не буду стяжание, ни брашно чуждему, Спасе, Сам мя ущедри.

Самоистукан бых страстьми, душу мою вредя Щедре, но в покаянии мя прими, и в разум призови, да не буду стяжание, ни брашно чуждему, Спасе, Сам мя ущедри.

Не послушах гласа Твоего, преслушах писание Твое законоположника: но в покаянии мя прими, и в разум призови, да не буду стяжание, ни брашно чуждему, Спасе, Сам мя ущедри.

Запев: Преподобная мати Марие, моли Бога о нас.

Марии: Безплотных жительство в плоти преходящи, благодать преподобная к Богу велию воистинну прияла еси, верно о чтущих тя предстательствуй. Темже молим тя, от всяких напастей и нас молитвами твоими избави.

Запев: Преподобная мати Марие, моли Бога о нас.

Марии: Великих безместий во глубину низведшися, неодолима была еси, но востекла еси помыслом лучшим, к крайней деяньми яве добродетели преславно, ангельское естество Марие, удививши.

Андрею: Преподобне отче Андрее моли Бога о нас.

Андрею: Андрее, отеческая похвало, молитвами твоими не престай моляся, предстоя Троице Пребожественней, яко да избавимся мучения, любовию предстателя твоего божественного всеблаженно призывающего, Криту удобрение.

Слава, Троицен: Нераздельное Существом, неслитное Лицы богословлю Тя, Троическое Едино Божество, яко единовластное и сопредельное, вопию Ти песнь великую, в вышних трегубо песнословимую.

Богородичен: И раждаеши и дествуеши, и пребываеши обоюду естеством Дева: Рождейся обновляет законы естества, утроба же раждает, не раждающая. Бог идеже хочет, побеждается естества чин: творит бо елика хочет.

Песнь 5.

Ирмос: От нощи утренююща, * Человеколюбче, * просвети молюся, * и настави и мене * на повеления Твоя: * и научи мя Спасе, * творити волю Твою.

В нощи житие мое преидох присно, тма бо бысть и глубока мне мгла, нощь греха: но яко дне сына Спасе покажи мя.

Рувима подражая окаянный аз, содеях безконный и законопреступный совет на Бога Вышняго, осквернив ложе мое, яко отчее он.

Исповедаюся Тебе Христе Царю, согреших, согреших, яко прежде Иосифа братия продавши, чистоты плод и целомудрия.

От сродников праведная душа связася, продася в работу сладкий, во образ Господень: ты же вся душе, продалася еси злыми твоими.

Иосифа праведнаго и целомудреннаго ума подражай окаянная, и неискусная душе, и не оскверняйся безсловесными стремленьми присно беззаконующи.

Аще и в рове поживе иногда Иосиф, Владыко Господи, но во образ погребения и востания Твоего: аз же что Тебе когда сицевое принесу?

Моисеов слышала еси ковчежец душе, водами, волнами носим речными, яко в чертозе древле бегающий дела горькаго совета фараонитска.

Аще бабы слышала еси, убивающая иногда безвозрастное мужское, душе окаянная, целомудрия деяние, ныне яко великий Моисей, сси премудрость.

Яко Моисей великий египтянина, ума уязвивши окаянная, не убила еси душе: и како вселишися, глаголи, в пустыню страстей покаянием?

В пустыню вселися великий Моисей, гряди убо подражай того житие, да и в купине богоявления душе, в видении будеши.

Моисеов жезл воображай душе, ударяющий море, и огустевающий глубину, во образ Креста Божественнаго: имже можеши и ты великая совершити.

Аарон приношаше огонь Богу, непорочный, неслестный: но Офни и Финес, яко ты душе, приношаху чуждее Богу оскверненное житие.

Яко тяжкий нравом, фараону горькому бых Владыко, Ианни, и Иамври, душею и телом, и погружен умом: но помози ми.

Калом смесихся окаянный умом, омьй мя Владыко, банею моих слез, молю Тя, плоти моя одежду убелив яко снег.

Аще испытаю моя дела Спасе, всякаго человека превозшедша грехами себе зрю, яко разумом мудрствуяй согреших, не неведением.

Пощади пощади Господи, создание Твое, согреших, ослаби ми, яко естеством чистый Сам сый един, и ин разве Тебе никтоже есть кроме скверны.

Мене ради Бог сый, вообразился еси в мя, показал еси чудеса, исцелив прокаженных, и расслабленного стягнув, кровоточивыя ток устави еси Спасе, прикосновением риз.

Кровоточивую подражай окаянная душе, притецы удержи ометы Христовы, да избавишися ран, и услышиши от Него: вера твоя спасе тя.

Низу снitchающую подражай о душе, прииди, припади к ногама Иисусовыма, да тя исправит, и да ходиши право стези Господни.

Аще и кладязь еси глубокий Владыко, источи ми воду из пречистых Твоих жил, да яко самаряныня, не ктому пияй жажду: жизни бо струи источаеши.

Силоам да будут ми слезы моя, Владыко Господи, да умью и аз зеницы сердца, и вижду Тя умно, Света превечна.

Запев: Преподобная мати Марие, моли Бога о нас.

Марии: Несравненным желанием всебогатая, Древу возжелевши поклонитися животному, сподобилася еси желанья, сподоби убо и мене улучшить вышния славы.

Запев: Преподобная мати Марие, моли Бога о нас.

Марии: Струи Иорданския прешедши, обрела еси покой безболезненный, плоти сласти избежавши, еяже и нас изми твоими молитвами преподобная.

Андрею: Преподобне отче Андрее моли Бога о нас.

Андрею: Яко пастырей изряднейша, Андрее премудре, избранна суца тя, любовию велию и страхом молю, твоими молитвами спасение улучшить, и жизнь вечную.

Слава, Троицен: Тя Троице славим, Единого Бога: Свят, Свят, Свят еси Отче, Сыне и Душе, простое Существо, Единице присно покланяемая.

Богородичен: Из Тебе облечеса в мое смешение, нетленная, безмужная Мати Дево, Бог создавый веки, и соедини Себе человеческое естество.

Песнь 6.

Ирмос: Возопих всем сердцем моим * к щедрому Богу, * и услыша мя * от ада преисподняго, * и возведе от тли живот мой.

Слезы Спасе очию моею, и из глубины воздыхания чисте приношу, вопиющу сердцу: Боже, согреших Ти очисти мя.

Уклонила еси душе, от Господа твоего, якоже Дафан и Авирон: но пощади, воззови из ада преисподняго, да не пропасть земная тебе покрывает.

Яко юница душе развирепевшая, уподобилася еси Ефрему, яко серна от тенет сохрани житие, вперивши деянием ум, и зрением.

Рука нас Моисеова да уверит душе, како может Бог прокаженное житие убелити, и очистити: и не отчайся сама себе, аще и прокаженна еси.

Волны Спасе прегрешений моих яко в мори Чермнем возвращающесе, покрывша мя внезапно, яко Египтяны иногда, и тристаты.

Неразумное душе произволение имела еси, яко прежде Израиль: Божественныя бо манны предсудила еси безсловесно, любосластное страстей объядение.

Кладенцы душе, предпочла еси хананейских мыслей, паче жилы камене, из негоже премудрости река, яко чаша проливает токи богословия.

Свиная мяса и котлы, и Египетскую пищу, паче небесныя предсудила еси душе моя, якоже древле неразумнии людие в пустыни.

Яко удари Моисей раб Твой жезлом камень, образно животворивая ребра Твоя прообразоваше, из нихже вси питие жизни Спасе, почерпаем.

Испытай душе и смотри, якоже Иисус Навин обетования землю, какова есть, и вселися в ню благозаконием.

Востани и побори, яко Иисус Амалика, плотския страсти, и гаваониты, лестныя помыслы присно побеждающыи.

Преиди време текущее естество, яко прежде ковчег, и земли оныя буди во одержании обетования душе, Бог повелевает.

Яко спас еси Петра, возопивша спаси, предварив мя Спасе от зверя избави, простер Твою руку, и возведи из глубины греховныя.

Пристаннице Тя вем утишное, Владыко, Владыко Христе: но от незаходимых глубин греха, и отчаяния мя предварив избави.

Аз есмь, Спасе, юже погубил еси древле царскую драхму: но вжег светильник Предтечу Твоего Слове, взыщи и обрящи Твой образ.

Запев: Преподобная мати Марие, моли Бога о нас.

Марии: Да страстей пламень угасиши, слез капли источила еси присно Марие, душею распаляема, ихже благодать подаждь и мне твоему рабу.

Запев: Преподобная мати Марие, моли Бога о нас.

Марии: Безстрастие небесное стяжала еси, крайним на земли житием мати. Темже тебе поющим, страстей избавитися молитвами твоими, молися.

Андрею: Преподобне отче Андрее моли Бога о нас.

Андрею: Критскаго тя пастыря, и председателя, и вселенныя молитвенника ведый, притекаю Андрее, и вопию ти: изми мя отче, из глубины греха.

Слава, Троицен: Троица емь проста, нераздельна, раздельна Личне, и Единица есмь Естеством соединена, Отец глаголет, и Сын, и Божественный Дух.

Богородичен: Утроба Твоя Бога нам роди, воображена по нам: Егоже яко Создателя всех, моли Богородице, да молитвами Твоими оправдимся.

Кондак, Глас 6:

Душе моя, душе моя, востани, что спиши? конец приближается, и имаши смутитися: воспряни убо, да пощадит тя Христос Бог, везде сый, и вся исполняй.

Икос: Христово врачество видя отверсто, и от Сего Адаму истекающее здравие, пострада, уязвися диавол, и яко бедствуя рыдаше, и своим другом возопи: что сотворю Сыну Мариину, убивает мя Вифлеемлянин, Иже везде сый, и вся исполняй.

Синаксарий первее Минеи, таже настоящий.

Стих: Умиления, Христе мой, образы даждь,

Стих: Поющим ныне канон Тебе Великий.

В сий день по древнему преданию поем и Великаго канона последование. Сей воистинну всех канонов величайший, изрядно и хитростно сочини и списа иже во святых отец наш Андрей архиепископ Критский, иже и Иерусалимский именуемый: иже устремляшеся убо из Дамаска, о четыренадесятем же лете своего возраста, наказанию грамматическому издався, и округленное наказание изучив, во Иерусалиме быв монашеское проходит житие, преподобне же и боголюбезне живый в безмолвном и немятежном житии. Многа убо и ина списания животополезная оставляет Божией Церкви, словеса же и каноны, паче же мужественне в торжественных бываемый же и показуемый. Со многими же иными, и настоящий Великий канон сочини: умиление неисчетно имущ: всякую бо Ветхаго и Новаго Завета повесть снискав и собрав, настоящее сочини сладкопение, от Адама яве, даже и до самага Христова Вознесения, и апостольския проповеди. Поущает убо сим всякую душу, еликим убо благим повести ревновати, и подражати по силе: еликих же злых отбегати, и присно к Богу востекати покаянием, слезами и исповеданием, и иным яве благоугождением. Обаче толико есть широкий и сладкогласный, яко и саму жесточайшую душу доволен умягчити, и к бодрости благой воздвигнути, аще точию с сокрушенным сердцем и вниманием подобным поется. Сотвори же сего, егда и патриарх Иерусалимский великий Софроний, Египтяныни Марии житие списа. Умиление бо и сие житие предлагает безчисленно, и многое прегрешившим, и согрешающим утешение дает, аще точию злых отступить хотят. Учинишася же и в настоящий день петися и прочитатися сицевыя ради вины: понеже бо к концу приближается святая Четыредесятница, да не человецы лениви бывше к духовным подвигом, небрежно забудутся, и еже целомудрствовати единою во всех престанут. Великий убо Андрей, якоже некий наказатель, повестьми Великаго канона, великих мужей глаголя добродетель, и злых паки отвращение, яко аще кто река бы: доблейших труждающихся предустроит, и мужественне к предним простиратися. Священный же Софроний преестественным своим словом, целомудрены и паки быти творит, и к Богу воздвижет, и не низпадати, ниже отчаятися, аще иногда некими прегрешеньми яти быша. Елико бо Божие человеколюбие и милость, вседушно от первых прегрешений обратитися произволяющим, еже о Египтяныни поведание представляет. Глаголется же Великий канон, негли аще кто река бы, и по тем мыслем, и воспомыновением: плодовит бо есть сего творец, изрядно та сложив, и яко прочих канонов по тридесяти и мало что к тропарем имущим: сей же, 250, проходит единаго коегождо неизреченную искапая сладость. Прикладно убо и подобно Великий сей канон, и велико стяжав умиление: темже и в велицей Четыредесятнице учинися. Сей изрядный канон и Великий и преподобныя Марии слово, тойже отец наш Андрей, первый в Константинь град принесе, егда от патриарха Иерусалимскаго Феодора, в шестый собор послан, в помощь прииде. Тогда бо изрядно на единовольники подвизався, еше пребывая в монашествоующих, клиру церкви в Константине граде причитается: таже диакон, и сиротопитатель в сей поставляется. И по мале архиепископ Критский быв: потом

близ негде ко глаголемому Иерису достиг в Митилине, ко Господу отыде, довольне своего престола в причастии быв. Того молитвами Боже, помилуй нас.

Таже блаженны с поклоны. Глас 6:

Во Царствии Твоем, помяни нас Господи.

Разбойника Христе * рая жителя сотворил еси, * на Кресте Тебе возопивша: * помяни мя, * того покаянию сподоби и мене недостойнаго.

Стих: Блажени нищии духом, яко тех есть Царство Небесное.

Маноя слышавши древле душе моя, * Бога в явлении бывша, * и из неплодове тогда приемша плод обетования, * того благочестие подражай.

Стих: Блажени плачущии, яко тии утешатся.

Сампсоновой поревновавши лености, * главу остригла еси душе дел твоих, * предавши иноплеменником, * любосластием целомудренную жизнь и блаженную.

Стих: Блажени кротцыи, яко тии наследят землю.

Прежде челюстию ослею победивый иноплеменники, * ныне пленение ласкосердству страстному обретеса: * но избегни душе моя подражания, * деяния и слабости.

Стих: Блажени алчущии и жаждущии правды, яко тии насытятся.

Варак и Иеффай военачальницы, * судии Израилевы предпочтени быша, * с нимиже Деворра мужеумная: * тех доблестьми душе вмужившися укрепися.

Стих: Блажени милостивии, яко тии помиловани будут.

Иаилино храбрство познала еси душе моя, * Сисара древле прободшую, * и спасение соделавшую, * деревом острым, слышиши, имже тебе Крест образуется.

Стих: Блажени чистии сердцем, яко тии Бога узрят.

Пожри душе жертву похвальную, * деяние яко дщерь принеси, * от Иеффаевы чистейшую: * и заколи яко жертву, страсти плотския Господеви твоему.

Стих: Блажени миротворцы, яко тии сынове Божии нарекутся.

Гедеоново руно помышляй душе моя, * с небесе росу подыми, * и приинки якоже пес, и пий воду, * от закона текущую, изгнетением письменным.

Стих: Блажени изгнани правды ради, яко тех есть Царство Небесное.

Илии священника осуждение * душе моя восприяла еси, * лишением ума приобретши страсти себе, * якоже он чада, делати беззаконная.

Стих: Блажени есте, егда поносят вам, и изженут, и рекут всяк зол глагол на вы лжуще Мене ради.

В судиях Левит, * небрежением свою жену, * дванадесетим коленом раздели, душе моя, * да скверну обличит от Вениамина беззаконную.

Стих: Радуйтеся и веселитесь, яко мзда вапша многа на небесех.

Любомудренная Анна молящися, * устне убо двизаше ко хвалению, глас же ея не слышашеса: * но обаче неплодна сущи, * сына молитвы раждает достойна.

Стих: Помяни нас Господи, егда приидеши во Царствии Твоем.

В судиях спричтесе Аннино порождение, великий Самуил, * егоже воспитала Армафема в дому Господни: * тому поревнуй душе моя, * и суди прежде инех дела твоя.

Стих: Помяни нас Владыко, егда приидеши во Царствии Твоем.

Давид на царство избран, * царски помазася рогом Божественнаго мира: * ты убо душе моя, аще хоцещи вышняго Царствия, * миром помажися слезами.

Стих: Помяни нас Святыи, егда приидеши во Царствии Твоем.

Помилуй создание Твое Милостиве, * ущедри руку Твоею творение: * и пощади вся согрешившия, * и мене паче всех, Твоих презревшаго повелений.

Слава, Троицен: Безначальну, и рождению же и происхождению, * Отцу покланяюся рождшему, * Сына славию рожденнаго, * пою сопросиявшаго Отцу же и Сыну, Духа Святаго.

Богородичен: Престественному Рождеству Твоему покланяемся, * по естеству славы Младенца Твоего * не разделяюще Богородительнице: * Иже бо един лицом, сугубыми исповедуется естествы.

Песнь 7.

Ирмос: Согрешихом, беззаконновахом, * неправдовахом пред Тобою, * ниже соблюдохом, * ниже сотворихом, * якоже заповедал еси нам: * но не предаждь нас до конца, * отцев Боже.

Согреших, беззаконновах, и овергох заповедь Твою, яко во гресех произведохся и приложих язвам струпы себе: но Сам мя помилуй, яко Благоутробен, отцев Боже.

Тайная сердца моего исповедах Тебе Судии моему, виждь мое смирение, виждь и скорбь мою, и вонми суду моему ныне, и Сам мя помилуй, яко Благоутробен, отцев Боже.

Саул иногда яко погуби отца своего душе ослыта, внезапно царство обрете к прослутию: но блюди, не забывай себе, скотския похоти твоя произволивши паче Царства Христова.

Давид иногда Богоотец, аще и согреши сугубо душе моя, стрелою убо устрелен быв прелюбодейства, копием же пленен быв убийства томлением: но ты сама тяжчайшими делы недугуеши, самохотными стремленьми.

Совокупи убо Давид иногда беззаконию беззаконие: убийству же любодейство растворив, покаяние сугубое показа абие: но сама ты лукавейшая душе соделала еси, не покаявшися Богу.

Давид иногда вообрази, списав яко на иконе песнь, еюже деяние обличает, еже содея, зовый: помилуй мя. Тебе бо Единому согреших всех Богу, Сам очисти мя.

Кивот яко ношашеся на колеснице, Зан оный, егда превращшуся тельцу, точно коснуся, Божиим искусися гневом: но того дерзновения убежавши душе, почитай Божественная честне.

Слышала еси Авессалома, како на естество воста? Познала еси того скверная деяния, имиже оскверни ложе Давида отца: но ты подражала еси того страстная и любосластная стремления.

Покорила еси неработное твое достоинство телу твоему: иного бо Ахитофела обретши врага, душе, снизила еси сего советом: но сия разсыпа Сам Христос, да ты всяко спасешися.

Соломон чудный, и благодати премудрости исполненный, сей лукавое иногда пред Богом сотворив, отступи от Него: ему же ты проклятым твоим житием, душе уподобилася еси.

Сластями влекомь страстей своих оскверняешия, увы мне, рачитель премудрости, рачитель блудных жен, и странен от Бога: его же ты подражала еси умом о душе! сладострастьми скверными.

Ровоаму поревновала еси не послушавшему совета отца, купно же и злейшему рабу Иеровоаму, прежнему отступнику душе: но бегай подражания, и зови Богу: согреших, ущедри мя.

Ахаавовым поревновала еси сквернам, душе моя, увы мне, была еси плотских скверн пребывалище, и сосуд срамлен страстей: но из глубины твоя воздохни, и глаголи Богу грехи твоя.

Попали Илия иногда двацти пятьдесят Иезавелиных, егда студныя пророки погуби, во обличение Ахаавово: но бегай подражания двою душе, и укрепляйся.

Заклучися тебе небо душе, и глад Божий постиже тя: егда Илии Фесвитянина якоже Ахаав, не покорися словесем иногда: но Сараффии уподобився, напитай пророчу душу.

Манассиева собрала еси согрешения изволением, поставльши яко мерзости страсти, и умноживши душе негодование: но того покаянию ревнующи тепле, стяжи умиление.

Припадаю Ти, и приношу Тебе, якоже слезы глаголы моя: согреших, яко не согреши блудница, и беззаконновах, яко иный никтоже на земли: но ущедри Владыко, творение Твое, и воззови мя.

Погребох образ Твой, и растлих заповедь Твою, вся помрачися доброта, и страстьми угасися, Спасе, свеща: но ущедрив воздаждь ми якоже поет Давид, радование.

Обратися, покайся, открий сокровенная, глаголи Богу вся ведущему: Ты веси моя тайная, едине Спасе: но Сам мя помилуй, якоже поет Давид по милости Твоей.

Исчезоша дни мои, яко соние востающаго: тем же яко Езекиа слезю на ложи моем, приложитися мне летом живота. Но кий Исаия предстанет тебе душе, аще не всех Бог?

Запев: Преподобная мати Марие, моли Бога о нас.

Марии: Возопивши к Пречистой Богоматери, первее отринула еси неистовство страстей, нужно стужающих, и посрамила еси врага запеншаго: но даждь ныне помощь от скорби, и мне рабу твоему.

Запев: Преподобная мати Марие, моли Бога о нас.

Марии: Егоже возлюбила еси, Егоже возжелела еси, Егоже ради плоть изнурила еси преподобная, моли ныне Христа о рабех: яко да милостив быв всем нам, мирное состояние дарует почитающим Его.

Андрею: Преподобне отче Андрее моли Бога о нас.

Андрею: На камени мя веры молитвами твоими утверди отче, страхом мя Божественным ограждая, и покаяние Андрее, подаждь ми, молюся ти: и избави мя от сети врагов ищущих мя.

Слава, Троицен: Троице простая, нераздельная, единосущная, и Естество едино, Светове, и Свет, и Свята три, и едино Свято поется Бог Троица: но воспой, прослави, Живот и Животы, душе, всех Бога.

Богородичен: Поем Тя, благословим Тя, покланяемся Ти Богородительнице, яко нераздельныя Троицы породила еси единого Христа Бога и Сама отверзла еси нам сушим на земли небесная.

Трипеснец. Глас 8.

Песнь 8.

Ирмос: Безначальнаго Царя славы, * Егоже трепещут небесныя силы * пойте священницы, * людие превозносите во вся веки.

Яко углие невестественнаго огня, попалите вещественныя страсти моя, возжизающе ныне во мне желание Божественныя любви, апостоли.

Трубы благогласныя Слова почтим, имиже падоша стены неутверждены вражия, и богоразумия утвердишася забрала.

Кумиры страстныя души моя сокрушите, иже храмы и столпы сокрушите врага, апостоли Господни, храмове освященнии.

Богородичен: Вместила еси невместимаго естеством: носила еси носящаго вся: доила еси Чистая, питающаго тварь, Христа Жизнодавца.

Иный трипеснец. Ирмос тойже.

Духа началохитростию создавше всю Церковь апостоли Христовы, в ней благословите Христа во веки.

Вострубивше трубою учений, низвергоша апостоли всю лесь идольскую, Христа превозносяще во вся веки.

Апостоли, доброе преселение, назирателие мира, и небеснии жителие, вас присно восхваляющия, избавите от бед.

Троицен: Трисолнечное всесветлое Богочачалие, единославное и единопредстольное Естество, Отче вседетелью, Сыне, и Божественный Душе, пою Тя во веки.

Богородичен: Яко честный и превышший престол, воспоим Божию Матерь непрестанно, людие, едину по рождестве Матерь и Деву.

Иный.

Ирмос: Егоже воинства небесная славят, * и трепещут херувими * и серафими, * всяко дыхание и тварь, * пойте, благословите, и превозносите * во вся веки.

Согрешивша Спасе помилуй, воздвигни мой ум ко обращению, прими мя кающегося, ущедри вопиюща: согреших Ти, спаси, беззаконновах, помилуй мя.

Колесничник Илиа, колесницею добродетелей вшед, яко на небеса, ношашеся превыше иногда от земных: сего убо душе моя, восход помышляй.

Иорданова струя первее, милотию Илииною Елиссеем, ста сюду и сюду: ты же, о душе моя, сея не причастилася еси благодати за невоздержание.

Елиссей иногда прием милоть Илиину, прият сугубую благодать от Бога: ты же о душе моя, сея не причастилася еси благодати за невоздержание.

Соманитида иногда праведнаго учреди, о душе, нравом благим: ты же не ввела еси в дом, ни странна, ни путника. Темже чертога изринешися вон, рыдающи.

Гиезиев подражала еси окаянная разум скверный всегда душе, егоже сребролюбие отложи поне на старость: бегай геенскаго огня, отступивши злых твоих.

Ты Озии душе поревновавши, сего прокажение в себе стяжала еси сугубо: безместная бо мыслиши, беззаконная же деши: остави яже имаши, и притецы к покаянию.

Ниневитяны душе слышала еси кающихся Богу, вретисцем и пепелом, сих не подражала еси: но явилася еси злейшая всех, прежде закона, и по законе прегрешивших.

В рове блата слышала еси Иеремию душе, града Сионя рыданьми вопиюща, и слез ищуща, подражай сего плачевное житие и спасешися.

Иона в Фарсис побеже, проразумев обращение ниневитянов, разуме бо яко пророк Божие благоутробие: темже ревноваше пророчеству не солгаться.

Даниила в рове слышала еси, како загради уста, о душе зверей: уведела еси, како отроцы иже о Азарии, погасиша верою пещи пламень горящий.

Ветхаго Завета вся приведох ти душе, к подобию, подражай праведных боголюбивая деяния, избегни же паки лукавых грехов.

Правосуде Спасе помилуй, и избави мя огня, и прещения, еже имам на суде праведно претерпети: ослаби ми прежде конца, добродетелию и покаянием.

Яко разбойник вопию Ти: помяни мя. Яко Петр плачу горце: ослаби ми Спасе. Зову яко мытарь: слезю яко блудница. прими мое рыдание, якоже иногда хананеино.

Гноение, Спасе, исцели смиренныя моя души: едине Врачу, пластырь мне наложи, и елей и вино, дела покаяния, умиление со слезами.

Хананею и аз подражая, помилуй мя, вопию, Сыне Давидов: касаюся края ризы, яко кровоточивая: плачу, яко Марфа и Мариа над Лазарем.

Слезную Спасе сткляницу, яко миро истощавая на главу, зову Ти якоже блудница, милости ищущая, мольбу приношу, и оставление прошу прияти.

Аще и никтоже, якоже аз согреши Тебе, но обаче прими и мене, Благоутробне Спасе, страхом каюшася, и любовию зовуща: согреших Тебе единому: помилуй мя Милостиве.

Пощади Спасе Твое создание, и възми яко Пастырь погибшее, предвари заблудшаго, восхити от волка, сотвори мя овча на пастве Твоих овец.

Егда Судие сядеши яко Благоутробен, и покажеш страшную славу Твою Спасе: о каковый страх тогда! Пещи горящей, всем боящимся нестерпимаго судища Твоего.

Запев: Преподобная мати Марие, моли Бога о нас.

Марии: Света незаходимаго мати, ты просветивши, от омрачения страстей разреши. Темже вшедши в духовную благодать, просвети Марие, ты верно восхваляющия.

Запев: Преподобная мати Марие, моли Бога о нас.

Марии: Чудо ново видево, ужасашеся божественный в тебе воистинну мати Зосима: ангела бо зряше во плоти, и ужасом весь исполняшеся, Христа поя во веки.

Андрею: Преподобне отче Андрее моли Бога о нас.

Андрею: Яко дерзновение имый ко Господу, Андрее Критский честная похвало, молю, молися разрешение от уз беззакония ныне обрести мне молитвами твоими, яко покаяния учитель, и преподобных слава.

Благословим Отца, и Сына, и Святаго Духа, Господа.

Троицен: Безначальне Отче, Сыне собезначальне, Утешителю Благий, Душе Правый: Слова Божия Родителю, Отца безначальна Слово, Душе живый и зиждяй, Троице Единице, помилуй мя.

Богородичен: Яко от оброчения червленицы Пречистая, умная багряница Еммануилева, внутрь во чреве Твоем плоть исткася. Темже Богородицу воистинну Тя почитаем.

Хвалим, благословим, покланяемся Господеви, поюще и превозносяще во вся веки.

Катавасия: Егоже воинства небесная славят, * и трепещут херувими * и серафими, * всяко дыхание и тварь, * пойте, благословите, и превозносите * во вся веки.

Трипеснец. Глас 8.

Песнь 9.

Ирмос: Воистинну Богородицу * Тя исповедуем, * спасеннии Тобою Дево Чистая, * с безплотными лики Тя величающе.

Источницы спасительныя воды явльшися апостоли, истаявшую душу мою греховною жаждою, оросите.

Плавающаго в пучине погибели, и в погружении уже бывша, Твоею десницею, якоже Петра, Господи спаси мя.

Яко соли, вкусных суще учений, гнильство ума моего изсушите, и неведения тьму отжените.

Богородичен: Радость яко родившая, плачь мне подаждь, имже Божественное утешение Владычице, в будущем дни обрести возмогу.

Иный.

Ирмос: Тя небесе и земли ходатаицу ...,

Тя благославное апостольское собрание, песньми величаем: вселенней бо светила светлая явистесья, прелесть отгоняще.

Благовестною мрежею вашею, словесныя рыбы уловивше, сия приносите всегда снедь Христу, апостоли блаженнии.

К Богу вашим прощением помяните нас апостоли, от всякаго избавитися искушения, молимся, любовию воспевающия вас.

Троичен: Тя триипостасную Единицу, Отче, Сыне, со Духом, Единого Бога единосущна пою, Троицу единосильную и безначальную.

Богородичен: Тя Детородительницу и Деву, вси роди ублажаем, яко Тобою избавльшесья от клятвы: радость бо нам родила еси Господа.

Иный.

Великаго канона ирмос: Безсеменнаго зачатия Рождество несказанное, Матере безмужныя нетленен Плод, Божие бо Рождение обновляет естества. Темже Тя вси роди, яко Богоневестную Матерь православно величаем.

Ум острупися, тело облезнися, недугует дух, слово изнеможе, житие умертвися, конец при дверех. Темже моя окаянная душе, что сотвориши, егда придет Судия испытати твоя?

Моисеово приведох ти душе, миробытие, и от того все заветное писание, поведающее тебе праведныя и неправедныя: от нихже вторыя, о душе, подражала еси, а не первыя, в Бога согрешивши.

Закон изнеможе, празднует Евангелие, писание же все в тебе небрежено бысть, пророцы изнемогоша, и все праведное слово: струпы твои, о душе, умножишася, не суцу врачу исцеляющему тя.

Нового привожду ти писания указания, вводящая тя душе, ко умилению: праведным убо поревнуй, грешных же отвращайся, и умилостави Христа молитвами же и пощеньми, и чистотою, и говением.

Христос вочеловечися, призвав к покаянию разбойники, и блудницы: душе покаяйся, дверь отверзется Царствия уже, и предвосхищают е фарисее и мытари и прелюбодей кающияся.

Христос вочеловечися, плоти приобщився ми, и вся, елика суть естества хотением исполни греха кроме, подобие тебе, о душе, и образ предпоказуя Своего снисхождения.

Христос волхвы спасе, пастыри созва, младенец множества показа мученики, старцы прослави, и старыя вдовицы, ихже не поревновала еси душе, ни деянием, ни житию: но горе тебе, вегда будещи судитися.

Постився Господь дний четыредесять в пустыни, последи взалка, показуя человеческое: душе, да не разленишися, аще тебе приложится враг, молитвою же и постом от ног твоих да отразится.

Христос искушашесья, диавол искушаше, показуя камень, да хлеби будут: на гору возведе видети вся царствия мира во мгновении. Убойся о душе, ловления, трезвися молися на всякий час Богу.

Горлица пустынолюбная, глас вопиющего возгласи, Христов светильник, проповедуяй покаяние, Ирод беззаконнова со Иродиадою. Зри душе моя, да не увязнеши в беззаконныя сети, но облобызай покаяние.

В пустыню вселися благодати Предтеча, и Иудея вся и Самария слышавше течаху, и исповедаху грехи своя, крещаящесе усердно: ихже ты не подражала еси душе.

Брак убо честный, и ложе нескверно: обоя бо Христос прежде благослови, плотию ядый, и в Кане же на браце воду в вино совершая, и показуя первое чудо: да ты изменишися о душе.

Разслабленного стягну Христос, одр взявша, и юношу умерша воздвиже, вдовиче рождение, и сотника отрока, и самаряныне явися, в Дусе службу Тебе, душе предживописа.

Кровоточивую исцели прикосновением края ризна Господь: прокаженные очисти: слепыя и хромыя просветив, исправи: глухия же и немые, и ничация низу исцели словом: да ты спасешися окаянная душе.

Недуги исцеляя, нищим благовествоваше, Христос Слово, вредныя уврачева, с мытари ядыше, со грешники беседоваше, Иаириовы дщере душу предумершую возврати осязанием руки.

Мытарь спасашеся, и блудница целомудрствоваше, и фарисей хваляся осуждашеся: ов убо, очисти мя: ова же, помилуй мя. Сей же величашеся вопия: Боже, благодарю Тя: и прочия безумныя глаголы.

Закхей мытарь бе, но обаче спасашеся, и фарисей Симон соблажняшеся, и блудница принимаше оставительная разрешения, от Имущаго крепость оставляти грехи: юже душе потщися подражати.

Блуднице, о окаянная душе моя, не поревновала еси, яже примши мира алавастр, со слезами мазаше нозе Спасове, отре же власы древних согрешений рукописание раздирающаго ея.

Грады, имже даде Христос благовестие, душе моя, уведала еси, како прокляти быша. Убойся указания, да не будеши якоже оны, ихже Содомляном Владыко уподобив, даже до ада осуди.

Да не горшая о душе моя, явишися отчаянием хананеи веру слышавшая, еяже дщи словом Божиим исцелися: Сыне Давидов, спаси и мене, воззови из глубины сердца, якоже она Христу.

Умилосердися спаси мя, Сыне Давидов помилуй, беснующияся словом исцеливый, глас же благоутробный яко разбойнику мне рцы: аминь глаголю тебе, со Мною будеши в раи, егда прииду во славе Моей.

Разбойник оглаголоваше Тя, разбойник Богословяше Тя, оба бо на кресте свисяста: но о Благоутробне, яко верному разбойнику Твоему, познавшему Тя Бога, и мне отверзи дверь славнаго Царствия Твоего.

Тварь содрогашеся распинаема Тя видящи, горы и каменья страхом распадахуся, и земля сотрясашеся, и ад обнажашеся, и соомрачашеся свет во дни, зря Тебе Иисусе пригвождена ко Кресту.

Достойных покаяния плодов не истяжи от мене: ибо крепость моя во мне оскуде, сердце мне даруй присно сокрушенное, нищету же духовную, да сия Тебе принесу, яко приятную жертву, едине Спасе.

Судие мой, и ведче мой, хотяй паки приити со ангелы, судити миру всему, милостивным Твоим оком тогда видев мя, пощади и ущедри мя Иисусе, паче всякаго естества человека согрешивша.

Запев: Преподобная мати Марие, моли Бога о нас.

Марии: Удивила еси всех странным житием твоим, ангелов чины, и человек соборы, невещественно поживши, и естество прешедши: имже, яко невещественныма ногама вшедши Марие, Иордан прешла еси.

Запев: Преподобная мати Марие, моли Бога о нас.

Марии: Умилостиви Создателя о хвалящих тя, преподобная мати, избавитися озлоблений и скорбей окрест нападающих: да избавившися от напастей, возвеличим непрестанно прославльшаго тя Господа.

Андрею: Преподобне отче Андрее моли Бога о нас.

Андрею: Андрее честный, и отче преблаженнейший, пастырю Критский, не престай моляся о воспевающих тя: да избавимся вси гнева и скорби, и тления, и прегрешений безмерных, чтущии твою память верно.

Слава, Троицен: Отца прославим, Сына превознесем, Божественному Духу верно поклонимся, Троице нераздельней, Единице по Существо, яко Свету и Светом, и Животу и Животом, животворящему и просвещающему концы.

Богородичен: Град Твой сохраняй Богородительнице Пречистая: в Тебе бо сей верно царствуй, в Тебе и утверждается: и Тобою побеждай, побеждает всякое искушение, и пленяет ратники, и проходит послушание.

Катавасия: Безсеменнаго зачатия Рождество несказанное, Матере безмужныя нетленен Плод, Божие бо Рождение обновляет естества. Темже Тя вси роди, яко Богоневестную Матерь православно величаем.

Светилен, яко обычно.

На стиховне самогласен, дважды. Глас 8:

В разбойническия пути впадши душе моя, * люте уязвлена еси от своих согрешений, * предавшиися неразумным врагом. * Но яко имущая время, * во умилении возопий: * упование ненадежных, * животе отчаявшихся, Спасе, возстави и спаси мя.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

В разбойническия пути впадши душе моя, * люте уязвлена еси от своих согрешений, * предавшиися неразумным врагом. * Но яко имущая время, * во умилении возопий: * упование ненадежных, * животе отчаявшихся, Спасе, возстави и спаси мя.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Во броня веры оболкшися добре, * и образом Крестным вооруживше себе, * воини благомощнии покажутся, * мучителем мужески противистеся, * и диаволю прелесть потребисте, * победители бывше, * венцев сподобистеся: * молитесь Христу о нас, во еже спастися душам нашим.

Слава, и ныне, Богородичен:

Приими гласы раб Твоих, * Всечистая Богородице Дево, * и моли непрестанно, * грехов разрешение, и мир даровати нам.

Совокупаем же и 1-й час, без стихословия. По Трисвятом, на всех часех кондак: Душе моя, душе моя: И на 3-м часе кафисма 9-я, на 6-м 10-я.

НА 6-М ЖЕ ЧАСЕ

Тропарь Пророчества, Глас 6:

Благоутробне, долготерпеливе * Вседержителю Господи, * низпосли милость Твою * на люди Твоя.

Прокимен, псалом 96, глас 6: Господь воцарися, да радуется земля.

Стих: Да веселятся острова мнози.

Пророчества Исаина чтение. [Глава 42, ст. 5 – 16.]

Тако глаголет Господь Бог, сотворивый небо, и водрузивый е, утверждаей землю, и яже на ней, и даяй дыхание людем, иже на ней, и дух ходящим на ней. Аз Господь Бог, призвах тя в правде, и удержу за руку твою, и укреплю тя: и дах тя в завет рода Израилева, во свет языков, отверсти очи слепых, извести от уз связанные, и из дому темницы, и седящая во тьме. Аз Господь Бог, сие Мое есть имя: славы Моея иному не дам, ниже добродетелей Моих истуканным. Яже из начала, се приидоша: и новая, яже Аз возведу, и прежде неже возвестити, явишася вам. Воспойте Господеву песнь нову: начальство Его, прославите имя Его от конец земли: сходящии в море, и плавающии по нему, острова и живуции на них. Возвеселися пустыне, и веси ея, придвория, и живуции в Кидаре: возвеселятся живуции на камени, от края гор возопиют. Дадят Богу славу, добродетели Его во островех возвестят. Господь Бог сил изыдет, и сокрушит рать, воздвигнет рвение, и возопиет на враги Своя с крепостию. Молчах, еда и всегда умолчу, и потерплю? терпех яко раждающая, истреблю и изсушу вкупе: опустошу горы и холми, и всяку траву их изсушу, и положу реки во острова, и луги изсушу. И наведу слепыя на путь, егоже не видеша, и по стезям, ихже не знаша, ходити сотворю им: сотворю им тьму во свет, и стропотная в правая. сия глаголы сотворю, и не оставлю их.

Прокимен, псалом 97, глас 6: Воспойте Господеву песнь нову яко дивна сотвори Господь, спасе Его десница Его.

Стих: Видеша вси концы земли спасение Бога нашего.

На 9-м часе, кафисма 11.